

Ugutan bunuh: Polis panggil Tony Pua
Malaysiakini.com
August 19, 2010

Ahli parimen Petaling Jaya Utara, Tony Pua, dan pembantunya hari ini diarahkan polis ke balai Mutiara Damansara pada jam 1 petang tadi untuk diambil cap jari dan sampel DNA.

Tindakan itu bagi membantu siasatan ugutan bunuh yang diterimanya minggu lalu.

Pada 11 Ogos lalu, sebuah bungkusan dialamatkan ke pejabat Pua di Damansara dari Tangkak. Ia dibuka oleh pembantu khas di pejabatnya dan beliau menjumpai sebitir peluru hidup bagi senapan M-16 dan sepucuk surat ugutan.

Surat berkenaan berbunyi: "Lu banyak berani?"

"Sekarang lu mau apa?"

"Jalan sekarang mau tengok depan, belakang, kiri, kanan bawah dan atas.

"Apa pasal?"

"Lu punya keluarga, rumah, pejabat, kereta - WHT004, wa sudah tau.

"Sendiri mau ingat. Lu fikirlah sendiri."

Pembantunya itu kemudian membuat laporan polis di Balai Polis Mutiara Damansara kira-kira dua jam selepas itu.

Pua yang menyifatkan insiden itu sebagai "tindakan pengecut" berkata, perbuatan itu mungkin berpunca daripada pandangan yang diutarakannya dalam satu majlis dialog pada 26 Julai lalu.

Jelasnya, dalam dialog Bajet 2011 kerajaan Selangor itu, beliau telah mencadangkan supaya kerajaan memansuhkan diskaun Bumiputera untuk membeli hartanah mewah.

"Isu ini kemudiannya dimainkan oleh Utusan Malaysia dan Umno," katanya pada satu idang media yang turut dihadiri dua orang ahli parlimen Dr Dzulkefly Ahmad (Kuala Selangor) dan Nurul Izzah Anwar (Lembah Pantai).

"Apa-apa yang saya cadangkan itu sepatutnya boleh didebatkan dalam suasana terbuka.

"Tidak ada cara yang boleh menjustifikasi tindakan seperti ini," katanya lagi yang mempunyai dua orang anak.

Jelasnya, cadangannya itu bertujuan supaya diskaun berkenaan digunakan untuk membantu golongan miskin dan bukan untuk terus membantu golongan berada.

Tambahnya, beliau menyerahkan cadangan tersebut untuk dipertimbangkan oleh kerajaan Selangor.